



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁRIU**

*Sumáriu Kazu*

*Agostu 2014*

*Tribunál Distritál Oe-Cusse*

**Sumariu prosesu julgamentu iha Tribunál Distritál Oe-Cusse**  
**Periódú Agostu 2014**

*Introdusaun*

Durante fulan Agostu 2014, Unidade Peskizador Jurídiku (Legal Research Unit) JSMP, kontinua hala'o monitorizasaun ba julgamentu kazu sira iha Tribunál Distritál Oe-Cusse no monitoriza maizumenuz kazu krime hamutuk 16 hosi total kazu 21, ne'ebé tribunál ne'e julga iha fulan Agostu nia laran.

Kazu hirak ne'e involve krime ofensa ba integridade física simples ho natureza violénsia doméstika 11, kazu ofensa ba integridade física simples 3, krime ameasa 1 no omisídiu negligente 1.

Hosi kazu 16 ne'e, tribunál konklui prosesu ba kazu hamutuk 12 no kazu 4 sei kontinua nia prosesu ho agenda rona desizaun finál.

Tuir mai deskripsaun sumáriu julgamentu kazu krime kompletu :

**1. Kazu krime ofensa ba integridade física simples ho natureza violénsia doméstika - Nú. Prosesu : 149/crime/2014/TDO**

Kompozisaun Tribunál	: Singulár
Juis	: Dr. João Ribeiro
Ministériu públiku	: Dr. Amrosio Rangel Freitas
Defeza	: Dr. Afonso Fatima Gomes
Konklusaun	: Kondena ho pena multa US\$60,00

Iha 18 Agostu 2014, Tribunál Distritál Oe-Cusse julga arguidu JF ne'ebé komete krime ofensa ba integridade física simples hasoru MMS nu'udar nia feen. Kazu ne'e akontese iha 28 Marsu 2014, iha Pante Makasar, Distritu Oe-Cusse.

Ministériu Públiku akuza katak iha 28 Marsu 2014, arguidu basa makas dala ida iha lezada nia kanuruk to'o lezada desmaia. Kazu ne'e akontese tanba sira diskuti malu kona-ba se mak atu fo han fahi.

Ministériu Públiku akuza arguidu kontra artigu 2,3 no 35 Lei Kontra Violénsia Doméstika konjugadu ho artigu 145 Kódigu Penál kona-ba ofensa ba integridade fízika simples.

Iha prosesu julgamentu arguidu konfesa no deklara katak nia arrepende ninia hahalok ne'ebé nia halo hasoru lezada.

Iha alegasaun finál, Ministériu Públiku alega katak arguidu ninia hahalok kontra artigu 145 Kódigu Penál no Lei Kontra Violénsia Doméstika. Arguidu komete krime ne'e ho livre hasoru lezada ne'ebé nu'udar nia feen rasik. Tanba ne'e, Ministériu Públiku husu ba tribunál atu aplika pena tuir arguidu nia kulpa.

Defeza argumenta katak arguidu konfesa faktus no arrepende ona ninia hahalok no lezada no arguidu mós dame malu ona no moris hamutuk nu'udar fen ho laen. Tanba ne'e, husu ba tribunál atu aplika pena ne'ebé justu ba arguidu.

Iha 26 Agostu 2014, tribunál konklui prosesu no kondena arguidu ho pena multa US\$ 60,00 ne'ebé sei selu kada loron US\$ 1,00 durante loron 60. Tribunál mós aplika pena alternativa durante loron 40 kuandu arguidu la selu pena multa refere.

## **2. Kazu krime ofensa ba integridade fízika simples - Nú. Prosesu : 146/crime/2014/TDO**

Kompozisaun Tribunál : Singulár  
Juis : Dr. João Ribeiro  
Ministériu públiku : Dr. Amrosio Rangel Freitas  
Defeza : Dr. Calisto Tout  
Konkluzau : Kondena pena multa US\$75,00

Iha 18 Agosstu 2014, Tribunál Distritál Oe-Cusse hala'o prosesu julgamentu ba kazu krime ofensa ba integridade fízika simples ne'ebé involve arguidu SO hasoru PB, iha 11 Marsu 2014, iha Sub-distritu Oe-Silo, Distritu Oe-Cusse.

Ministériu Públiku akuza katak iha 11 Marsu 2014, arguidu lori fatuk ida atu tuda lezada nia maun maibé fatuk ne'e kona fali lezada ain hodi rezulta kanek. Aktu ne'e akontese tanba arguidu ba buka nia feen ne'ebé halai tiha ba iha nia inan/aman sira. Momentu arguidu to'o iha ne'ebá, lezada nia maun mak lakohi atu lezada fila fali ba nia laen. Tanba ne'e arguidu nervozu hodi tuda lezada nia maun maibe kona fali lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples.

Iha prosesu julgamentu arguidu konfesa faktus sira hotu no deklara katak nia arrepende ba ninia hahalok.

Iha alegasaun finál, ministériu públiku husu ba tribunál atu aplika pena tuir arguidu nia kulpa. Tanba arguidu konfesa katak nia komete duni krime hanesan haktuir iha akuzasaun ministériu públiku.

Defeza husu ba tribunál atu aplika pena ne'ebé adekua bazeia ba konsiderasaun sira katak arguidu konfesa faktus, kolabora diak ho tribunál no arrepende ba ninia hahalok.

Iha 25 Agostu 2014, tribunál konklui prosesu kazu ne'e no kondena arguidu ho pena multa US\$75,00 ne'ebé sei selu US\$1,00 kada loron durante loron 75. Tribunál mós aplika pena alternativa durante loron 50 iha prizaun kuandu arguidu la selu pena multa refere.

**3. Kazu krime ofensa ba integridade física simples ho natureza violénsia doméstika - Nú. Prosesu : 116/crime/2014/TDO**

Kompozisaun Tribunál : Singulár  
Juis : Dr. João Ribeiro  
Ministériu públiku : Dr. Amrosio Rangel Freitas  
Defeza : Dr. Calisto Tout  
Konkluzau : Kondena ho pena prizaun tinan 1 suspende ba tinan 2

Iha 19 Agostu 2014, Tribunál Distritál Oe-Cusse julga arguidu PO ne'ebé involve ofensa ba integridade física simples hasoru MC nu'udar nia feen. Kazu ne'e akontese iha 07 Maiu 2014, iha Sub-distritu Oe-Sili, Distritu Oe-Cusse.

Ministériu Públiku akuza katak iha 07 Maiu 2014, arguidu tuku lezada nia kanuruk dala tolu, tebe dala rua iha kanotak no kolu lezada nia roupa iha isin hodi soe sai ba liur. Kazu ne'e akontese tanba arguidu diskonfia lezada iha relasaun ho mane seluk.

Ministériu Públiku akuza arguidu kontra artigu 145 Kódigu Penál konjugadu ho artigu 2, 3, 35 Lei Kontra Violénsia Doméstika.

Iha prosesu produsaun ba provas arguidu rekoñese no konfesa faktu sira ne'ebé akuza ba nia no arrende ninia hahalok.

Iha alegasaun finál, Ministériu Públiku alega katak arguidu komete krime ne'ebé previstu iha artigu 145 Kódigu Penál no Lei Kontra Violénsia Doméstika. Tanba ne'e husu ba tribunál atu aplika pena prizaun fulan tolu suspende ba tinan ida.

Entretantu defeza husu ba tribunál atu aplika pena ne'ebé adekuaudu tanba arguidu konfesa no kolabora diak durante prosesu julgamentu.

Iha 26 Agostu 2014, tribunál konklui prosesu ne'e no kondena arguidu ho pena iha prizaun tinan ida (1) suspende ba tinan rua (2).

**4. Kazu krime ofensa ba integridade física simples ho natureza violénsia doméstika - Nú. Prosesu : 147/crime/2014/TDO**

Kompozisaun Tribunál : Singulár  
Juis : Dr. João Ribeiro  
Ministériu Públiku : Dr. Amrosio Rangel Freitas  
Defeza : Dr. Calisto Tout  
Konkluzau : Konden pena prizaun tinan 1 suspende ba tinan 2

Iha 19 Agostu 2014, Tribunál Distritál Oe-Cusse hala'o julgamentu ba kazu krime ofensa ba integridade física simples ne'ebé involve arguidu FA hasoru FC nu'udar nia eis feen. Kazu ne'e akontese iha 16 Feveireiru 2014, iha Sub-distritu Pante Makasar - Distritu Oe-cusse.

Ministériu Públiku akuza katak iha 16 Feveireiru 2014, arguidu basa dala ida iha lezada nia hasan karuk to'o metan no bubu. Aleinde ne'e, arguidu tuku dala ida tan iha lezada nia ibun no rezulta kanek no bubu. Arguidu mós la halo tuir obrigasaun alimentus ba nia oan nain tolu.

Kazu ne'e akontese tanba arguidu la halo tuir obrigasaun alimentar ba nia oan nain tolu durante tinan ida ona.

Ministériu Públiku akuza arguidu kontra artigu 2, 3, 35, 36 Lei Kontra Violénsia Doméstika no artigu 145 Kódigu Penál Timor-Leste.

Iha prosesu produsaun ba provas arguidu konfesa faktu sira no arrepende ninia hahalok ne'ebé nia komete ona hasoru lezada.

Mesmu nune'e, relasiona ho krime la halo tuir obrigasaun alimentar, tribunal omolga tanba lezada rasik hakarak dada fali krime ne'e.

Iha alegasaun finál, Ministériu Públiku husu ba tribunál atu aplika pena prizaun tinan ida (1) suspende ba tinan rua (2).

Defeza argumenta katak durante prosesu julgamentu arguidu konfesa no kolabora diak ho tribunál no parte rua mós moris hamutuk nu'udar fen no laen. Tanba ne'e, husu ba tribunál atu kondena arguidu ho pena adekuaudu tuir arguidu nia kulpa.

Iha 22 Agostu 2014, Tribunál Distritál konklui prosesu ne'e no kondena arguidu ho pena prizaun tinan ida (1) suspende ba tinan rua (2). Tribunál mós kondena arguidu selu multa US\$ 20,00 tanba la kumprimentu notifikasaun tribunál.

## **5. Kazu krime ofensa ba integridade física simples ho natureza violénsia doméstika - Nú. Prosesu : 113/crime/2014/TDO**

Kompozisaun Tribunál	: Singulár
Juis	: Dr. João Ribeiro
Ministériu públiku	: Dr. Amrosio Rangel Freitas
Defeza	: Dr. Calisto Tout
Konkluzau	: Kondena ho pena prizaun tinan 1 suspende ba tinan 1

Iha 19 Agostu 2014, Tribunál Distritál Oe-Cusse julga arguidu AC ne'ebé komete ofensa ba integridade física simples hasoru BE nu'udar nia feen. Kazu ne'e akontese iha 08 Marsu 2014, iha Sub-distritu Oe-Silo, Distritu Oe-cusse.

Ministériu Públiku akuza katak iha 08 Marsu 2014, arguidu lori sinelus baku dala rua iha lezada nia kabas karuk, dala ida iha liman karuk, no dala ida iha lezada nia hirus matan. Aktu ne'e rezulta lezada sofre isin metan no bubu. Kazu ne'e akontese tanba arguidu la satisfas ho lezada ne'ebé istori malu ho viziñu tanba deit sira nia oan mane ku'u viziñu nia ai ata.

Ministériu Públiku akuza arguidu kontra artigu 145 Kódigu Penál konjuga ho artigu 2, 3, 35, Lei Kontra Violénsia Doméstika.

Iha prosesu julgamentu arguidu konfesa no rekoñese faktu sira no arrepende ba ninia hahalok ne'ebé hasoru lezada.

Iha alegasaun finál, Ministériu Públiku husu ba tribunál aplika pena prizaun fulan tolu (3) suspende ba tinan ida (1).

Defeza husu ba tribunál atu aplika pena ne'ebé adekuaudu tanba konsidera katak arguidu konfesa ona ninia hahalok no hatudu ninia kolaborasaun diak durante prosesu julgamentu.

Iha 26 Agostu 2014, tribunál konklui prosesu ne'e no kondena arguidu ho pena iha prizaun tinan ida (1) suspende ba tinan ida (1).

## **6. Kazu krime ofensa ba integridade fízika simples ho natureza violénsia doméstika - Nú. Prosesu : 125/crime/2014/TDO**

Kompozisaun Tribunál	: Singulár
Juis	: Dr. João Ribeiro
Ministériu públiku	: Dr. Amrosio Rangel Freitas
Defeza	: Dr. Calisto Tout
Konkluzau	: Kondena ho pena fulan 4 prizaun suspende ba tinan 1

Iha 20 Agostu 2014, Tribunál Distritál Oe-Cusse hala'o prosesu julgamentu ba kazu krime ofensa ba integridade fízika simples ne'ebé involve arguidu FT hasoru CA nu'udar nia feen. Kazu ne'e akontese iha 17 Abril 2014, iha Sub-distritu Oe-Silo, Distritu Oe-Cusse.

Ministériu Públiku akuza katak iha 17 Abril 2014, arguidu uza sinelus baku iha lezada nia ulun dala tolu, no dala rua iha lezada nia kanuruk. Aleinde ne'e arguidu kaer lezada nia liman rua no riba lezada tun ba rai. Kazu ne'e akontese tanba arguidu ne'ebé lanu hela no la kontente ho lezada ne'ebé husu arguidu tur hakmatek no la bele ba buka tan tua tanba udan hela. Aktu hirak ne'e rezulta lezada sofre bubu no mean.

Relasiona ho aktu ne'e Ministériu Públiku akuza arguidu kontra artigu 145 Kódigu Penál konjugadu ho artigu 2, 3, 35 Lei Kontra Violénsia Doméstika.

Iha prosesu julgamentu arguidu konfesa faktu sira no deklarata katak nia arrepende ba ninia hahalok ne'ebé komete ona hasoru lezada.

Iha aleagsaun finál, Ministériu Públiku konfirma katak arguidu kontra artigu 145 Kódigu Penál ne'ebé bele hetan kastigu to'o tinan tolu ka multa. Ministériu Públiku continua subliña katak arguidu deviaser proteze lezada nu'udar nia feen ne'ebé lora-lora prepara hahan ba nia, fase nia rounpa no seluk-seluk tan. Tanba ne'e Ministériu Públiku husu ba tribunál atu aplika pena tuir arguidu ninia kulpa.

Defeza argumenta katak arguidu konfesa faktus, arrepende no deklarata katak iha futuru sei la repete tan ninia hahalok hasoru lezada. Tanba ne'e, husu ba tribunál atu aplika pena ne'ebé justu.

Tribunál konklui kedas prosesu kazu ne'e no kondena arguidu ho pena prizaun fulan ha'at (4) suspende ba tinan ida (1).

### **7. Kazu krime ofensa ba integridade física simples -Nú. Prosesu: 119/crime/2014/TDO**

Kompozisaun Tribunál : Singulár  
Juís : Dr. João Ribeiro  
Ministériu públiku : Dr. Amrosio Rangel Freitas  
Defeza : Dr. Calisto Tout  
Konkluzau : Kondena pena multa US\$75,00

Iha 20 Agostu 2014, Tribunál Distritál Oe-Cusse hala'o prosesu julgamentu ba kazu krime ofensa ba integridade física simples ne'ebé komete hosi arguidu JL hasoru JC. Kazu ne'e akontese iha 13 Marsu 2014, iha Sub-distritu Passabe, Distrito Oe-Cusse.

Ministériu Públiku akuza katak iha 13 Marsu 2014, arguidu riba lezada tun ba rai, tuku lezadu dala ida iha lezada nia ibun, iha hasan los dala ida no kanuruk dala ida no rezulta lezada hetan kanek iha ibun.

Kazu ne'e akontese tanba arguidu ne'ebé hanesan xefe aldeia organiza comunidade iha aldeia laran atu dada bee ba comunidade sira maibe lezada la partisipa. Tanba ne'e arguidu ba husu tuir, maibe sira deskuti malu no ikus-mai provoca akontesimentu ne'e.

Relasiona ho aktu ne'e Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples.

Iha prosesu julgamentu, arguidu konfesa no deklar katak nia arrepende ba ninia hahalok ne'ebé nia komete hasoru lezadu.

Iha alegasaun final, Ministériu Públiku konfirma katak arguidu kontra artigu 145 Kódigu Penál ho moldura penal to'o tinan 3 ka multa. Tanba arguidu konfesa ninia hahalok, Ministériu Públiku husu ba tribunál atu aplika pena multa US\$75,00 no pena alternativa durante loron 50 iha prizaun kuandu arguidu la kumpri pena multa refere.

Defeza husu ba tribunál atu aplika pena ne'ebé adekua ba arguidu tanba arguidu konfesa faktus no kolabora diak ho tribunál.

Tribunál konklui prosesu ne'e no kondena arguidu ho pena multa US\$75,00 ne'ebé sei selu US\$1,00 kada loron durante loron 75. Tribunál aplika mós pena alternativa ba arguidu durante loron 50 iha prizaun kuandu arguidu la selu pena multa refere.

### **8. Kazu krime ofensa ba integridade física simples ho natureza violénsia doméstika - Nú. Prosesu : 122/crime/2014/TDO**

Kompozisaun Tribunál : Singulár  
Juis : Dr. João Ribeiro  
Ministériu Públiku : Dr. Amrosio Rangel Freitas  
Defeza : Dr. Calisto Tout

Konkluzau : Kondena ho pena prizaun fulan 6 suspende ba tinan 1

Iha 20 Agostu 2014, Tribunál Distritál Oe-Cusse julga arguidu AB ne'ebé involve iha ofensa ba integridade fízika simples hasoru MGC nu'udar nia feen. Kazu ne'e akontese iha 05 Abril 2014, iha Sub-distritu Oe-Silo, Distritu Oe-Cusse.

Ministériu Públiku akuza katak iha 05 Abril 2014, arguidu basa dala rua iha lezada nia hasan karuk no dala rua iha hasan loos no rezulta lezada sofre sinál metan no bubu iha matan.

Kazu ne'e akontese tanba lezada haruka arguidu ba buka servisu, nune'e arguidu no lezada diskuti malu to'o arguidu komete krime ne'e hasoru lezada.

Relasiona ho aktu ne'e, Ministériu Públiku akuza arguidu kontra artigu 145 Kódigu Penál konjuga ho artigu 2, 3, 35 Lei Kontra Violénsia Doméstika.

Iha prosesu julgamentu arguidu konfesa faktu sira ne'ebé akuza ba nia no deklarata katak nia arrende ninia hahalok ne'ebé komete ona hasoru lezada.

Iha alegasaaun finál, Ministériu Públiku husu ba tribunál atu aplika pena prizaun fulan 9 suspende ba tinan 3 tanba arguidu provadu kontra duni krime ne'ebé previstu iha artigu 145 Kódigu Penál ho moldura penal to'o tinan 3 ka multa.

Defeza husu ba tribunál atu aplika pena ne'ebé justu tanba konsidera katak arguidu konfesa no arrende ona ninia hahalok ne'ebé nia komete hasoru lezada.

Iha 26 Agostu 2014, tribunál konklui prosesu kazu ida ne'e no kondena arguidu ho pena prizaun fulan ne'en (6) suspende ba tinan ida (1).

**9. Kazu krime ofensa ba integridade fízika simples ho natureza violénsia doméstika - Nú. Prosesu : 60/crime/2014/TDO**

Kompozisaun Tribunál : Singulár  
Juis : Dr. João Ribeiro  
Ministériu Públiku : Dr. Amrosio Rangel Freitas  
Defeza : Dr. Afonso Gomes Fatima  
Konkluzau : Kondena ho pena multa US\$60,00

Iha 21 Agostu 2014, Tribunál Distritál Oe-Cusse julga arguida MB ne'ebé komete krime ofensa ba integridade fízika simples hasoru nia laen. Kazu ne'e akontese iha 26 Janeiru 2014, iha Sub-distritu Pante-Makassar, Distritu Oe-cusse.

Ministériu Públiku akuza katak iha 26 Janeiru 2014, arguida no lezada hemu tua no sira nain rua lanu hotu. arguida tuda lezadu ho ai balok ida no kona iha lezadu nia rentos to'o rezulta kanek. Arguida no lezadu ho kondisaun lanu hotu. Kazu ne'e akontese tanba arguida la satisfas ho lezadu ne'ebé dun arguida mak foti lezadu nia osan iha bolsu.

Ministériu Públiku akuza arguidu kontra artigu 145 Kódigu Penál konjuga ho artigu 2, 3, 35 Lei Kontra Violénsia Doméstika.

Iha prosesu julgamentu arguida konfesa faktu sira no deklarata katak nia arrepende ninia hahalok hasoru lezadu.

Iha alegasaun finál Ministériu Públiku husu ba tribunál atu aplika pena multa US\$135,00 no kada loron arguida sei selu US\$1,00, tanba arguida provadu komete ona krime tuir artigu 145 Kódigu Penál.

Defeza husu ba tribunál aplika justisa ba arguida tanba arguida ferik ona ka tama ba kategoria terseira idade, arguida rekoñese sala no arrepende ninia hahalok.

Tribunál konklui kedas prosesu kazu ne'e no kondena arguida ho pena multa US\$60,00 ne'ebé sei selu kada loron US\$1,00 durante loron 60. Tribunál mós aplika pena alternativa durante loron 40 iha prizaun kuandu arguida la kumpri pena multa refere.

**10. Kazu krime ofensa ba integridade física simples ho natureza violência doméstica - Nú. Prosesu : 115/crime/2014/TDO**

Kompozisaun Tribunál	: Singulár
Juis	: Dr. João Ribeiro
Ministériu públiku	: Dr. Amrosio Rangel Freitas
Defeza	: Dr. Afonso Fatima Gomes
Konkluzaan	: Kondena pena prizaun tinan 1 suspende ba tinan 2

Iha 21 Agostu 2014, Tribunál Distritál Oe-Cusse hala'o prosesu julgamentu ba kazu krime ofensa ba integridade física simples ne'ebé involve arguidu JR hasoru RM nu'udar nia feen. Kazu ne'e akontese iha 01 Abril 2014, iha Sub-distritu Pante-Makassar, Distritu Oe-Cusse.

Ministériu Públiku akuza katak iha 01 Abril 2014, arguidu tuku lezada dala ida iha kakorok no rezulta moras. Alende ne'e, arguidu mós uza katana kose ba iha lezada nia hasan karuk rezulta lezada nia hasan hetan kanek kois. Kazu ne'e akontese tanba lezada sira istoria-malu kona-ba bibi lakon.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 2, 3, 35 Lei Kontra Violência Doméstica.

Iha prosesu julgamentu arguidu konfesa faktu sira ne'ebé akuza ba nia no deklarata katak nia arrepende ba ninia hahalok.

Iha alegasaun finál, Ministériu Públiku husu ba tribunál aplika pena multa US\$60,00 kada loron US\$1,00 durante loron 60 tanba konsidera katak arguidu komete duni krime violência doméstica hasoru nia feen.

Defeza husu ba tribunál atu fo justisa ba arguidu tanba konsidera katak arguidu konfesa faktus, arrepende ba ninia hahalok, sira dame malu ona no arguidu mós promete atu la repete tan hahalok hanesan ne'e iha futuru.

Iha 27 Agostu 2014, tribunál konklui prosesu ne'e no kondena arguidu ho pena prizaun tinan ida (1) suspende ba tinan rua (2).



## **11. Kazu krime ofensa ba integridade fízika simples - Nú. Prosesu: 117/crime/2014/TDO**

Kompozisaun Tribunál : Singulár  
Juis : Dr. João Ribeiro  
Ministériu públiku : Dr. Amrosio Rangel Freitas  
Defeza : Dr. Afonso Fatima Gomes  
Konkluzau : Kondena ho pena multa US\$90,00

Iha 21 Agostu 2014, Tribunál Distritál Oe-Cusse julga arguidu FMQ ne'ebé akuzadu involve iha krime ofensa ba integridade fízika simples hasoru PN. Kazu ne'e akontese iha 09 Abril 2014, iha Sub-distritu Pante-Makassar.

Ministériu Públiku akuza katak iha 09 Abril 2014, arguidu lori ai ida baku iha lezadu nia kabas dala ida, buti lezadu nia kakorok dala ida no tata lezadu nia kelen no rezulta kanek. Kazu ne'e akontese tanba sira hadau malu rai hodi kuda modo.

Relasiona ho aktu ne'e, Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples.

Iha prosesu julgamentu arguidu konfesa faktu sira hotu no deklarata katak nia arrepende ona ninia hahalok.

Iha alegasaun finál, Ministériu Públiku konfirma katak arguidu kontra duni artigu 145 Kódigu Penál ne'ebe ho moldura penal to'o tinan 3 ka multa. Tanba ne'e, husu ba tribunál atu aplika pena multa US\$75,00 no sei selu kada loron US\$1,00.

Entretantu defeza husu ba tribunál atu fo justisa ba arguidu. Defeza konsidera katak arguidu konfesa no arrepende ba ninia hahalok no kolabora diak ho tribunál.

Iha 27 Agostu 2014, tribunál konklui prosesu kazu ne'e no kondena arguidu ho pena multa US\$90,00 ne'ebé kada loron arguidu selu US\$1,00 durante loron 90. Tribunál mós aplika pena alternativa kumpri iha prizaun durante loron 60 kuandu arguidu la kumpri pena multa ne'e..

## **12. Kazu krime ameasa - Nú. Prosesu : 134/crime/2014/TDO**

Kompozisaun Tribunál : Singulár  
Juis : Dr. João Ribeiro  
Ministériu públiku : Dr. Amrosio Rangel Freitas  
Defeza : Dr. Calisto Tout  
Konkluzau : Kondena pena prizaun fulan 3 suspende tinan 1

Iha 22 Agostu 2014, Tribunál Distritál Oe-Cusse hala'o julgamentu ba kazu krime ameasa no kondena arguidu CAF ho pena prizaun fulan 3 suspende ba tinan 1 tanba provadu komete duni krime ameasa hasoru AI. Kazu ne'e akontese iha 27 Marsu Sub-distritu Nitibe, Distritu Oe-Cusse.

Ministériu Públiku akuza katak iha 27 Marsu 2014, iha natar laran arguidu lori ai ida ameasa atu baku mate lezada no hakoi iha natar laran. Arguidu ninia liafuan ne'e halo lezadu senti ameasadu.

Kazu ne'e akontese tanba lezada la kumpri ninia promesa ne'ebé promete ba arguidu. Antes ne'e arguidu no lezada konkorda atu arguidu fila rai natar lezada ninian no too hetan rezultadu. Depois ne'e fahe rezultadu ba malu maibé depois arguidu fila tiha natar ne'e lezada buka fali ema seluk hodi kuda hare.

Relasiona ho aktu ne'e, Ministériu Públiku akuza arguidu kontra artigu 157 Kódigu Penál kona-ba krime ameasa. Iha prosesu julgamentu arguidu konfesa no rekoñese katak nia ameasa duni lezada.

Iha parte seluk lezada kontinua reforsa faktu sira iha akuzasaun hosi Ministériu Públiku no deklarata katak depois nia hetan ameasa nia senti tauk atu halo movimentu tanba distansia ba nia to'os no merkadu dok no liu hosi ailaran.

Iha alegasaun finál, Ministériu Públiku husu ba tribunál aplika pena multa US\$75,00 tanba arguidu komete duni krime maesa hasoru lezada. Entretantu defeza husu atu tribunál aplika pena tuir lia loos ba arguidu.

Tribunál konklui prosesu kazu ne'e no kondena arguidu ho pena fulan tolu (3) suspende ba tinan ida (1).

### **13. Kazu krime ofensa ba integridade fízika simples ho natureza violénsia doméstika - Nú. Prosesu : 154/crime/2014/TDO**

Kompozisaun Tribunál	: Singulár
Juis	: Dr. João Ribeiro
Ministériu públiku	: Dr. Amrosio Rangel Freitas
Defeza	: Dr. Calisto Tout
Konkluzaan	: Sei kontinua prosesu

Iha 25 Agostu 2014, Tribunál Distritál Oe-Cusse julga arguidu FQ ne'ebé komete krime ofensa ba integridade fízika simples hasoru nia oan ne'ebé sei ho idade tinan 3. Kazu ne'e akontese iha 30 Maiu 2014, iha Sub-distritu Oe-Silo, Distritu Oe-Cusse.

Ministériu Públiku akuza katak iha 30 Maiu 2014, arguidu basa lezadu dala tolu iha hasan karuk hodi rezulta lezadu nia matan bubu no mean. Kazu ne'e akontese tanba lezadu tanis atu fila ba uma wainhira arguidu hadia hela nia kolega nia gravador iha kolega ne'e nia uma. Wainhira sira fila to'o uma, arguidu kontinua hirus no ameasa atu baku mate nia feen.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 2, 3, 35 Lei Kontra Violénsia Doméstika.

Iha prosesu julgamentu ba kazu ne'e arguidu konfesa faktus no deklarata katak nia arrepende ba ninia hahalok.

Iha alegasaun finál, Ministériu Públiku husu ba tribunál atu aplika pena multa US\$75,00 tanba konsidera katak arguidu komete duni krime tuir artigu 145 Kódigu Penál hasoru nia oan ne'ebé sei idade minoridade.

Entretantu parte defeza husu ba tribunál aplika pena ne'ebé adekuada ba arguidu tanba arguidu konfesa faktus, arrepende ba ninia hahalok no dame malu ona.

Depois rona tiha alegasaun hosi parte sira, tribunál marka fali julgamentu ba leitura sentensa ba iha 08 Setembre 2014.

**14. Kazu krime ofensa ba integridade fízika simples ho natureza violénsia doméstika - Nú. Prosesu : 156/crime/2014/TDO**

Kompozisaun Tribunál	: Singulár
Juis	: Dr. João Ribeiro
Ministériu Públiku	: Dr. Amrosio Rangel Freitas
Defeza	: Dr. Calisto Tout
Konkluzau	: Sei kontinua prosesu

Iha 25 Agostu 2014, Tribunál Distritál Oe-Cusse julga arguidu MC ne'ebé akuzadu involve iha krime ofensa ba integridade fízika simples hasoru YO nu'udar nia feen. Kazu ne'e akontese iha iha 19 Maiu 2014, iha Sub-distritu Pante-Makassar, Distritu Oe-Cusse.

Ministériu Públiku akuza katak iha 19 Maiu 2014, arguidu tebe lezada dala ida iha kelen sorin loos no kauza metan. Arguidu kontinua tuku dala ida iha kanotak sorin loos no tuku iha lezada nia hirus matan dala ida hodi rezulta bubu metan.

Kazu ne'e akontese tanba lezada foti arguidu nia telemovel no lee mensajen iha laran ne'ebé hakerek ho lian Indonezia katak "*bapak sayang, nanti besok jadi krim uang ko?*" Tanba lee mensajen ne'e halo lezada nervozu no hirus arguidu no arguidu la simu hodi komete krime hasoru lezada.

Ministériu Públiku akuza arguidu kontra artigu145 Kódigu Penál kona-ba ofensa ba integridade fízika simples konjuga ho artigu 2, 3, 35 Lei Kontra Violénsia Doméstika.

Iha audiensia julgamentu arguidu konfesa no rekoñese ninia hahalok no arguidu mós deklarara katak nia arrepende ona nia hahalok.

Iha alegasaun final, Ministériu Públiku husu ba tribunál atu aplika pena multa US\$120,00 ne'ebé sei selu US\$1,00 kada lora durante lora 120 nia laran.

Entretantu defeza husu ba tribunál atu aplika pena tuir arguidu nia kulpa no husu ba tribunál atu konsidera sirkustansia atenuantes sira hanesan arguidu konfesa faktus, arrepende no parte rua dame malu ona.

Depois rona tiha alegasaun hosi parte sira, tribunál marka fali julgamentu ba leitura sentensa ba iha 08 Setembre 2014.

**15. Kazu krime ofensa ba integridade fízika simples ho natureza violénsia doméstika - Nú. Prosesu : 158/crime/2014/TDO**

Kompozisaun Tribunál : Singulár  
Juis : Dr. João Ribeiro  
Ministériu Públiku : Dr. Amrosio Rangel Freitas  
Defeza : Dr. Afonso Fatima Gomes  
Konkluzau : Sei kontinua prosesu

Iha 26 Agostu 2014, Tribunál Distritál Oe-Cusse hala’o julgamentu ba kazu krime ofensa ba integridade fízika simples ne’ebé involve arguidu RDJT hasoru TM nu’udar nia feen. Kazu ne’e akontese iha 16 Maiu 2014, iha Sub-distritu, Pante-Makassar, Distritu Oe-Cusse.

Ministériu Públiku akuza katak iha 16 Maiu 2014, arguidu tuku lezada nia rentos dala ida no rezulta bubu. Aktu ne’e akontese tanba arguidu ho lezada diskuti malu kona-ba termus bee manas ne’ebé arguidu ninia subriña halo monu rahun.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 2, 3, 35 Lei Kontra Violénsia Doméstika.

Iha audiensia julgamentu arguidu konfesa faktus no rekonese ninia hahalok. Arguidu mós deklara katak nia arrepende ona nia hahalok.

Iha alegasaun finál, Ministériu Públiku husu ba tribunál atu aplika pena multa US\$120 ne’ebé sei selu US\$ kada loron durante loron 120.

Entretantu defeza husu ba tribunál kondena arguidu tuir arguidu nia kulpa. Defeza husu ba tribunál konsidera katak arguidu konfesa faktus, arrepende ninia hahalok nomós dame malu ona.

Depois rona tiha alegasaun hosi parte sira, tribunál marka fali julgamentu ba leitura sentensa ba iha 08 Setembru 2014.

**16. Kazu krime omisídiu negligente – Nú. Prosesu : 126/crime/2014/TDO**

Kompozisaun Tribunál : Singulár  
Juis : Dr. João Ribeiro  
Ministériu públiku : Dr. Amrosio Rangel Freitas  
Defeza : Dr. Calisto Tout  
Konkluzau : Sei kontinua prosesu

Iha 26 Agostu 2014, Tribunál Distritál Oe-Cusse hala’o julgamentu ba kazu krime omisídiu negligente ne’ebé involve arguidu FMS hasoru lezadu Justino Eco (matebian) no Antonio dos Santos Eco iha 25 Juñu 2013, iha Sub-distritu Pante-Makassar, Distritu Oe-Cusse.

Ministériu Públiku akuza katak iha 25 Juñu 2013, arguidu ho kareta kamioneta ida soke motor mega-pro ida ne’ebe matebian Justino Eco lori hela no tula ho Antonio dos Santos Eco. Asidente ne’e rezulta Justino Eco kanek todan no lezadu Antonio ain tohar. Iha momentu ne’eba lori kedas ba iha HNGV hodi halo tratamentu maibé iha 5 Jullu 2014, Justino Eco mate.

Entertantu lezadu Antonio dos Santos Eco aleja iha ain parte karuk. Kazu ne'e akontese tanba arguidu sira ses hosi rai kuak no okupa tiha lezadu sira nia dalan.

Ministériu Públiku akuza arguidu kontra artigu 140 Kódigu Penál kona-ba omisídiu negligente.

Iha audiensia julgamentu arguidu konfesa faktus sira no akuzasaun hosi Ministériu Públiku no deklara katak nia arrepende nia hahalok. Arguidu mós deklara katak nia ajuda ona família matebian ho osan US\$200,00 no semente saka 20.

Relasiona ho faktu hirak ne'e, reforsa hosi matebian nia alin katak arguidu fo duni sasan no osan hanesan temi iha leten.

Iha alegasaun finál, Ministériu Públiku husu ba tribunál atu kondena arguidu no pena prizaun tinan ha'at (4). Ministériu Públiku konsidera katak arguidu komete duni krime omisídiu negligente hanesan haktuir iha akuzasaun.

Entretantu parte defeza husu ba tribunál atu kondena arguidu tuir arguidu nia kulpa. Defeza husu ba tribunál atu konsidera katak arguidu la ho intensaun atu soke lezadu na'in rua maibé ida ne'e hanesan asidente ne'ebé nia labele kontrola.

Depois rona tiha alegasaun hosi parte sira, tribunál marka fali julgamentu ba leitura sentensa ba iha 09 Setembru 2014.

Sumariu kazu ida ne'e bele imprimi tan ho apoiu jenerozu husi povu Amerikanu liu husi Ajensia Estadus Unidus ba Dezenvolvimentu Internasionál (USAID) bazeia ba Akordu Kooperasaun ho Númeru AID-486-A-13-00007 ba programa Ba Distrito iha Timor-Leste, ne'ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha komunikadu impresna ida ne'e nia laran no la nesesariamente refleta USAID ka Governu Estadus Unidus Amerikanu nia opiniaun".

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl